



PRAVILA STUDIRANJA ZA II CIKLUS STUDIJA NA UNIVERZITET FINRA TUZLA

Decembar, 2024. godine

Na osnovu člana 63. Zakona o visokom obrazovanju Tuzlanskog kantona („Službene novine Tuzlanskog kantona“, broj: 21/2021 - prečišćen tekst, 22/2021 - autentično tumačenje, 5/2022, 11/2022 i 16/2022) i člana 39. Statuta visokoškolske ustanove Univerziteta FINRA Tuzla, na 13. (trinaestoj) sjednici održanoj dana 26.12.2024. godine, Senat visokoškolske ustanove Univerziteta FINRA Tuzla (u daljem tekstu: Univerzitet), donosi:

PRAVILA STUDIRANJA ZA DRUGI CIKLUS STUDIJA NA UNIVERZITETU FINRA TUZLA

I OPŠTE ODREDBE

Član 1. (Predmet regulisanja)

Ovim Pravilima bliže se uređuju organizacija i izvođenje studija drugog ciklusa (u daljem tekstu: magistarski studij), struktura studijskog programa, trajanje studija, uslovi upisa, organizacija nastave i polaganje ispita, mobilnost studenata, završni magistarski rad, isprave o završenom studiju kao i druga pitanja od značaja za organizaciju i izvođenje magistarskog studija na Univerzitetu, u skladu sa Zakonom i Statutom.

Član 2. (Magistarski studij)

- (1) Magistarski studij na Univerzitetu organizuje se i ostvaruje kao:
 - jednogodišnji studij (dva semestra) koji se vrednuje sa 60 ECTS bodova,
 - dvogodišnji studij (četiri semestra) koji se vrednuje sa 120 ECTS bodova.
- (2) Studijski program realizuje se u dva semestra u toku trajanja jedne akademske godine, pri čemu svaki semestar ima po 15 nastavnih sedmica. Jedan semestar studija vrednuje se sa 30 ECTS bodova.
- (3) Ukupno opterećenje studenta vrši se prema Evropskom sistemu prenosa bodova- ECTS bodova a sastoji se od nastave (predavanja, auditorne i/ili praktične vježbe), prakse, seminarski radovi i drugo, u skladu sa studijskim programom, samostalnog rada (testovi, završni ispiti) i izrade završnog (magistarskog) rada.

II ORGANIZACIJA I IZVOĐENJE STUDIJA

Član 3. (Organizacija magistarskog studija)

- (1) Univerzitet, odnosno fakulteti u okviru njega, organizuju i izvode magistarski studij iz naučnih oblasti za koje su matični.
- (2) Magistarski studij se organizuje i izvodi za redovne i vanredne studente, kao i studente učenjem na daljinu ili kombinovanjem navedenih načina studiranja.
- (3) Magistarski studij organizuje se i izvodi prema utvrđenim studijskim programima za određene akademske studijske programe na svakom fakultetu u okviru Univerziteta.
- (4) Studijske programe, iz prethodnog stava, na prijedlog nastavno-naučnog vijeća fakulteta (u daljem tekstu: NNV fakulteta) donosi Senat Univerziteta.

Član 4. (Vrednovanje studijskih bodova)

- (1) U skladu sa evropskim sistemom prenosa bodova (ECTS), obim studijskog programa iznosi 60 ECTS bodova u jednoj studijskoj godini, odnosno 120 ECTS bodova u dvije studijske godine.
- (2) Broj studijskih bodova za pojedini predmet određuje se prema ukupnom opterećenju studenta koje se sastoji od:
 - nastave (predavanje, auditorne i/ili praktične vježbe, praksa, seminari i dr.);
 - individualnog rada (seminarski radovi, zadaće, projekti, grafički radovi i dr.);

- polaganja ispita;
 - izrade magistarskog rada;
 - ostalih vidova angažovanja studenata.
- (3) Završni (magistarski) rad vrednuje se sa 8 ECTS bodova.

Član 5. (Zajednička nastava)

Univerzitet može za pojedine predmete izvoditi zajedničku nastavu za studente sa različitih studijskih odsjeka/smjerova – zajednički studijski programi, ukoliko je za te programe predviđen nastavni plan koji se preklapa u najmanje 80% gradiva. Odluku o organizovanju zajedničke nastave za pojedine studijske programe donosi Senat Univerziteta FINRA.

Član 6. (Zajednički studijski program)

- (1) Univerzitet može organizovati i izvoditi magistarski studij iz jedne ili više naučnih oblasti, na dva ili više fakulteta ili zajedno sa drugom visokoškolskom ustanovom iz zemlje ili inostranstva (zajednički studijski program).
- (2) Zajednički studijski program mogu organizovati fakulteti iz naučnih oblasti za koje su matične.
- (3) Odluku o organizovanju zajedničkog studijskog programa na prijedlog NNV fakulteta donosi Senat.
- (4) Odlukom o organizovanju zajedničkog studijskog programa uređuju se sva pitanja vezana za ovaj studij, a posebno program studija, način organizacije studija, te akademska titula i zvanje koje se stiče završetkom studija.
- (5) Predlagači zajedničkog studija utvrđuju program koji je usvojen od strane nadležnih tijela svih učesnika u programu.

Član 7. (Zaključivanje Ugovora)

Organizatori zajedničkog studijskog programa, iz prethodnog člana, zaključuju ugovor kojim se utvrđuju:

- uslovi i načini realizacije nastave;
- akademska titula i stručno zvanje/zvanja koja se stiču nakon završetka studija;
- cijenu studija;
- sadržaj i izgled diplome;
- procedure odobravanja i odbrane diplomskog rada;
- korištenje prostora i opreme;
- uslovi sticanja i raspoređivanja sredstava;
- rukovođenje studijem;
- sastav Vijeća zajedničkog studija;
- kod koga će se voditi evidencija o studentima (upis, izdavanje uvjerenja, diploma i sl.)
- druga prava i obaveze organizatora zajedničkog studijskog programa.

Član 8. (Rukovođenje organizacijom magistarskog studija)

- (1) Organizacijom magistarskog studija po pravilu rukovodi Voditelj magistarskog studija kojeg, na prijedlog dekana bira i razrješava NNV fakulteta, na mandatni period od 2 (dvije) akademske godine.
- (2) Voditelj magistarskog studija obavlja poslove iz svoje nadležnosti za sve generacije studenata upisane na drugi ciklus studija. Za svoj rad odgovoran je dekanu i NNV fakulteta.
- (3) U slučaju da ne bude izabran Voditelj drugog ciklusa studija, poslove organizacije drugog ciklusa studija obavlja dekan ili prodekan za naučnoistraživački rad fakulteta na kome se organizuje i izvodi magistarski studij.

Član 9. (Nadležnosti Voditelja magistarskog studija)

Voditelj magistarskog studija obavlja sljedeće poslove:

- rukovodi i predsjedava sjednicama Odbora drugog ciklusa studija na fakultetu,

- učestvuje u realizaciji odluka NNV fakulteta i Senata Univerziteta FINRA koje su u vezi sa nastavnim procesom drugog ciklusa studija na fakultetu
- u saradnji sa prodekanom za nastavu i studentska pitanja predlaže plan realizacije nastave magistarskog studija te predlaže raspored predavanja i raspored ispitnih termina,
- prati realizaciju izvođenja nastave i održavanja ispitnih termina i podnosi dekanu mjesečni izvještaj;
- izrađuje i podnosi NNV-u Analizu prolaznosti studenata nakon svakog ispitnog roka i na kraju akademske godine;
- najmanje jednom godišnje podnosi izvještaj o svom radu dekanu i NNV fakulteta;
- obavlja i druge poslove iz djelokruga svog rada, po nalogu dekana.

Član 10. **(Odbor magistarskog studija)**

- (1) NNV fakulteta na kojem je organizovan magistarski studij, na početku akademske godine imenuje Odbor magistarskog studija (u daljem tekstu: Odbor), sastavljen od neparnog broja članova, a najmanje tri, odnosno najmanje po jedan nastavnik iz svake naučne oblasti studijskog programa za koji se Odbor imenuje. Voditelj drugog ciklusa studija i Prodekan za naučnoistraživački rad fakulteta su članovi Odbora po funkciji. Voditelj drugog ciklusa studija rukovodi radom i predsjedava sjednicama Odbora.
- (2) Odbor razmatra prijave tema magistarskog rada; utvrđuje da li prijavljene teme pripadaju studijskom programu i smjeru/usmjerenju; po potrebi vraća prijavu teme studentu na doradu i dopunu sa konkretnim primjedbama i uputama za korekciju; utvrđuje prijedlog NNV fakulteta o prihvatanju teme i mentora; utvrđuje prijedlog Komisije za ocjenu i odbranu magistarskog rada; obavlja druge poslove u skladu sa odlukama Senata Univerziteta FINRA i NNV fakulteta.
- (3) Odredbe iz stava 1 i 2 ovoga člana primjenjivaće se ukoliko Statutom Univerziteta nije drugačije utvrđeno.

III STRUKTURA STUDIJSKOG PROGRAMA

Član 11. **(Studijski programi)**

- (1) Studijski programi su koncipirani u skladu sa postojećim usmjerenjima i naučnim oblastima koje se izučavaju na prvom ciklusu studija svakog fakulteta u okviru Univerziteta FINRA, a mogu se mijenjati po postupku propisanom za njihovo donošenje.
- (2) Lista predmeta studijskih programa se može ažurirati svake školske godine sa ciljem da se prate stručna i naučna kretanja u odgovarajućoj oblasti.
- (3) Senat Univerziteta FINRA na prijedlog NNV fakulteta na početku svakog ciklusa, odnosno nove akademske godine, donosi odluku za koje predmete će se organizovati nastava, na osnovu interesovanja kandidata i raspoloživih resursa.
- (4) Izmjene i dopune studijskog programa vrše se i objavljuju prije raspisivanja konkursa za upis na magistarski studij.

Član 12. **(Sadržaj studijskog programa)**

Studijski program magistarskog studija sadrži:

- naziv i ciljeve studijskog programa;
- uslove upisa na studijski program;
- stručni i akademski naziv te stepen koji se stiče završetkom studija;
- popis kompetencija, znanja i vještina koje se stiču završetkom studija;
- silabuse obaveznih i izbornih predmeta po studijskim godinama i semestrima sa strukturom aktivnosti i broj sati potrebnih za njihovu realizaciju;
- broj sati individualnog opterećenja studenta po predmetu;
- druge oblike nastave za sticanje i usavršavanje profesionalnih znanja i vještina (seminarski radovi, projekti, praktični rad, analize slučaja i dr.);
- prikaz obaveznih uslova za pohađanje nastave i polaganje predmeta;
- bodovnu vrijednost svakoga predmeta i završnoga rada iskazanu u ECTS bodovima;

- uslove prelaska s drugih studijskih programa u okviru istih ili srodnih područja studija;
- način izbora predmeta iz drugih studijskih programa;
- uslove upisa u sljedeći semestar, odnosno sljedeću godinu studija te način završetka studija;
- način izvođenja studija i način provjere znanja za svaki predmet;
- ostala pitanja značajna za izvođenje studijskoga programa.

IV TRAJANJE STUDIJA

Član 13.

(Trajanje magistarskog studija)

- (1) Magistarski studij traje dva semestra (jedna studijsku godinu) za studente koji su završili četverogodišnji dodiplomski studij i nose ukupno 60 ECTS bodova, odnosno četiri semestra (dvije studijske godine) za studente koji su završili trogodišnji dodiplomski studij i nose ukupno 120 ECTS bodova, tako da u zbiru sa prvim ciklusom nosi 300 ECTS bodova.
- (2) Na studente drugog ciklusa studija analogno se primjenjuju odredbe zakona i Statuta Univerziteta kojima su utvrđeni prestanak statusa studenta kao i druga pitanja koja nisu uređena ovim Pravilima.

V USLOVI UPISA

Član 14.

(Upis na drugi ciklus studija)

- (1) Upis na drugi ciklus studija vrši se na osnovu javnog konkursa Univerziteta FINRA, koji se raspisuje najkasnije dva mjeseca prije početka nastave i objavljuje u štampanim sredstvima dnevnog javnog informisanja, oglasnoj ploči i web-stranici Univerziteta FINRA.
- (2) Konkursom se utvrđuju bliži uslovi za upis, način odabira prijavljenih kandidata, u skladu sa studijskim programom, te potrebna dokumentacija.

Član 15.

(Pravo na upis)

- (1) Pravo upisa na studijske programe magistarskog studija u trajanju od jedne godine imaju lica koja su završila odgovarajući dodiplomski studij/studij prvog ciklusa u trajanju od četiri godine (sa ostvarenih 240 ECTS bodova), a pravo upisa na studijske programe drugog ciklusa u trajanju od dvije godine imaju lica koja su završila odgovarajući dodiplomski studij/prvi ciklus studija u trajanju od tri godine (sa ostvarenih 180 ECTS bodova), a što se bliže definiše studijskim programom.
- (2) Kandidat koji ispunjava uslove iz stava 1. ovog člana, dužan je popuniti Prijavu za upis na magistarski studij i priložiti svu potrebnu originalnu dokumentaciju ili ovjerene fotokopije.
- (3) Strani državljani i osobe bez državljanstva imaju pravo upisa na magistarski studij pod jednakim uslovima kao i državljani BiH, uz prethodno izvršenu nostrifikaciju/akademsko priznavanje diplome.

Član 16.

(Rangiranje kandidata za upis)

- (1) Upis kandidata na magistarski studij vrši se u skladu sa odobrenim planom upisa i utvrđenom rang listom.
- (2) U slučaju da je broj kandidata za upis veći od odobrenog, izbor kandidata vrši se na konkurentskoj osnovi, u skladu sa rezultatima postignutim na dodiplomskom studiju. Postupak rangiranja kandidata vrši posebna tročlana komisija koju imenuje NNV dotičnog fakulteta.
- (3) Kandidat koji je ostvario pravo na upis, a u predviđenom roku nije izvršio upis, gubi pravo upisa, a umjesto njega pravo na upis stiče sljedeći kvalifikovani kandidat na rang-listi.

Član 17.
(Predmeti koji su preduslov za pohađanje)

Ukoliko se na magistarski studij upisuju studenti koji dolaze sa visokoškolskih ustanova koje po svojoj matičnosti nisu srodni fakultetima odnosno studijskim programima koje student želi pohađati, Naučno-nastavno vijeće svakog fakulteta dužno je utvrditi predmete koji su preduslov za pohađanje drugog ciklusa, kao i način njihovog polaganja.

Član 18.
(Sticanje statusa studenta)

- (1) Status studenta stiče se upisom na odabrani studijski program, a dokazuje se studentskom ispravom-indeksom.
- (2) Prava i obaveze studenta koja proizilaze iz Zakona, Statuta i ovih pravila detaljnije se regulišu posebnim sporazumom/ugovorom.

Član 19.
(Prelazak na drugi studijski program)

- (1) Studentu Univerziteta FINRA, kao i studentu sa drugih univerziteta može se omogućiti prelazak sa jednog studijskog programa na drugi, pod uslovima i kriterijima koje odlukom utvrđuje Senat Univerziteta FINRA, na prijedlog NNV dotičnog fakulteta.
- (2) Pravo na promjenu studijskog programa/prelaz sa drugog univerziteta može se ostvariti prije početka nastave u semestru, s tim da prelaz nije moguć tokom akademske godine u kojoj je student prvi puta upisao studij drugog ciklusa.
- (3) Uz zahtjev za promjenu studijskog programa/prelaz prilažu se uvjerenja o statusu studenta i o postignutom uspjehu na studijskom programu te druge relevantne informacije o započetom studijskom programu.
- (4) Položeni ispiti na prethodno upisanom studijskom programu priznaju se ako predmeti iz kojih su ispiti položeni, po svom sadržaju i obimu odgovaraju nastavnom predmetu drugog studijskog programa od najmanje 80%. Priznavanjem ispita priznaje se i ocjena kojom je student ocijenjen, te broj bodova u skladu sa nastavnim planom studijskog programa.
- (5) Student podnosi zahtjev dekanu fakulteta najkasnije do 01.09. tekuće akademske godine. O zahtjevu studenta, odlučuje NNV fakulteta.

VI ORGANIZACIJA NASTAVE I POLAGANJE ISPITA

Član 20.
(Nastava na magistarskom studiju)

- (1) Nastava na magistarskom studiju se izvodi po usvojenim Nastavnim planovima i programima, koje donosi Senat Univerziteta na prijedlog nastavno-naučnog vijeća dotičnog fakulteta.
- (2) Kalendar organizacije i realizacije nastave u okviru akademske godine koji uključuje i termine za završne, popravne i dodatne popravne ispite utvrđuje Senat Univerziteta FINRA, prije početka akademske godine. Kalendar se objavljuje najkasnije 15 dana prije početka nastave na oglasnoj ploči i web stranici Univerziteta FINRA.

Član 21.
(Izvođenje nastave)

- (1) Nastava se izvodi u svim raspoloživim i za to predviđenim prostorima Univerziteta.
- (2) Dio nastave može se izvoditi i u odgovarajućim naučnoistraživačkim organizacijama, laboratorijima, zdravstvenim ustanovama i poslovnim subjektima, javnim ustanovama svih nivoa obrazovanja, institucijama vlasti, vladinim organima i institucijama, pravosudnim institucijama/ustanovama, nevladinim organizacijama, medijskim subjektima te u drugim institucijama, ako za to postoje odgovarajući uvjeti, a po odobrenju Senata Univerziteta.
- (3) Praktični rad i stručna praksa mogu se organizovati i izvoditi kao sastavni dio redovne nastave ili kao zasebne nastavne aktivnosti.

Član 22.
(Prisustvo studenata)

- (1) Prisustvo svim vidovima nastave je obavezno za redovne studente, o čemu se vodi evidencija na osnovu koje student, po odslušanom semestru, dobija potpis od predmetnog nastavnika.
- (2) Fakulteti su dužni posebno organizovati dio nastave za vanredne studente, radnim danima, te u terminima prilagođenim takvim studentima, s mogućnošću da se organizuje i u dane vikenda. Vanredni student nisu obavezni pohađati nastavu, ali moraju izvršavati sve ostale obaveze predviđene nastavnim programima.
- (3) Na studijskim programima učenja na daljinu nastava se održava pomoću savremenih sredstava učenja na daljinu, a student je obavezan izvršavati sve druge obaveze predviđene nastavnim programom.

Član 23.
(Upis i ovjera semestra)

- (1) Nakon okončanja semestra i izvršenja ostalih obaveza vrši se ovjera prethodnog i upis narednog semestra. Zimski semestar ovjerava se nakon završetka nastave zimskog, a ovjera ljetnog semestra po završetku ljetnog semestra.
- (2) Tokom ovjere semestra evidentira se broj ECTS kredita koje je student ostvario.
- (3) Uslovi upisa u drugu godinu studija na dvogodišnjim studijskim programima drugog ciklusa bliže se utvrđuju studijskim programom u skladu sa Zakonom.
- (4) Student nakon odslušanog posljednjeg semestra zadržava status studenta apsolventa do kraja zimskog semestra naredne akademske godine u kojem periodu ima pravno na polaganje preostalih završnih ispita u svakom kalendarskom mjesecu.

Član 24.
(Obnova upisa u prvu godinu studija)

- (1) Student koji obnavlja upis u prvu godinu studija, a ostvario je najmanje 30 ECTS kredita iz predmeta s te godine studija u prethodnoj akademskoj godini, ima pravo da, pored predmeta koje nije položio u prethodnoj akademskoj godini prisustvuje nastavi i polaže ispite iz naredne studijske godine, s tim da ukupno opterećenje po semestru ne prelazi 30 ECTS kredita.
- (2) Na ova pitanja, kao i na druga pitanja vezana za organizaciju nastave i način nastavnog rada, te za prava i obaveze studenata i predmetnih nastavnika, tokom studija, koja nisu regulisana ovim Pravilima, primjenjivat će se Statut Univerziteta FINRA i Pravila studiranja na prvom ciklusu studija/ dodiplomskom studiju na Univerzitetu FINRA.

Član 25.
(Polaganje ispita/završnog rada)

- (1) Student koji je odslušao nastavu i izvršio druge obaveze predviđene strukturom studijskog programa za taj predmet, ima pravo polaganja ispita/završnog rada, u utvrđenim ispitnim terminima.
- (2) Student je dužan prijaviti završni ili popravni ispit koji se organizuju u objavljenim redovnim ispitnim terminima.
- (3) Ispiti za sve studente se polažu javno i obavezno se održavaju u prostorijama Univerziteta FINRA.
- (4) Ispiti se mogu polagati usmeno, pismeno ili kombinacijom pismene i usmene provjere, odnosno praktično ukoliko je to predviđeno silabusom nastavnog predmeta.
- (5) Student ima pravo uvida u pismeni dio ispita, kao i pravo na podnošenje prigovora, pri čemu se procedure provode na isti način kao i za studente prvog ciklusa studija.
- (6) Konačna ocjena o uspjehu studenta utvrđuje se na osnovu ukupnih aktivnosti studenta tokom nastave (predispitne obaveze) i uspjeha postignutog na završnom ispitu, s tim da se samo prolazna ocjena unosi u indeks studenta.
- (7) U slučaju da student ni nakon drugog polaganja popravnog ispita ne ostvari dovoljan broj bodova za prolaznu ocjenu, kao i u slučaju zahtjeva studenta za ponavljanje ispita, primijenit će se postupak predviđen za prvi ciklus studija na Univerzitetu FINRA.

Član 26.
(Mirovanje prava i obaveza)

- (1) Prava i obaveze studenta mogu mirovati najviše jednu akademsku godinu.
- (2) Prava i obaveze studenta miruju:
 - za vrijeme dok je student/ica na porodiljskom odsustvu;
 - za vrijeme trajanja bolesti zbog koje nije mogao pohađati nastavu i polagati ispite (što se dokazuje mišljenjem nadležne zdravstvene ustanove);
 - radi obavljanja odobrene stručne prakse u zemlji ili inostranstvu;
 - iz drugih opravdanih razloga.
- (3) Zahtjev za mirovanje prava i obaveza podnosi se prije početka akademske godine izuzev zahtjeva za mirovanje po osnovu utvrđenom alinejom 1. i 2. ovog člana koji se može se podnijeti u toku akademske godine, a aješenje po zahtjevu donosi dekan fakulteta.

VII MOBILNOST STUDENATA

Član 27.
(Studij u inostranstvu)

- (1) Student ima pravo u toku magistarskog studija provesti određeno vrijeme na srodnoj ustanovi visokog obrazovanja u zemlji ili inostranstvu, posredstvom međunarodnih programa za razmjenu studenata, a na osnovu bilateralnih ugovora koje zaključuje Univerzitet FINRA, ili na prijedlog studenta, po prethodno pribavljenoj saglasnosti fakulteta.
- (2) Prava i obaveze studenta po osnovu mobilnosti utvrđena su Pravilnikom o mobilnosti na Univerzitetu FINRA.
- (3) Mobilnost studenata ne podrazumijeva izdavanje diplome od strane univerziteta na kome student boravi, osim ukoliko je ugovorom između univerziteta drugačije regulisano.

VIII ZAVRŠNI MAGISTARSKI RAD

Član 28.
(Završetak magistarskog studija)

- (1) Magistarski studij završava se polaganjem svih ispita, te izradom i javnom odbranom završnog magistarskog rada u skladu sa studijskim programom.
- (2) Tema magistarskog rada mora biti iz oblasti studijskog programa.

Član 29.
(Tema magistarskog rada)

- (1) Student drugog ciklusa studija u trajanju od jedne godine ima pravo na odobrenje teme za izradu završnog magistarskog rada nakon odslušanog prvog semestra, a najkasnije do kraja ljetnog semestra.
- (2) Student drugog ciklusa studija u trajanju od dvije godine ima pravo na odobrenje teme za izradu završnog magistarskog rada nakon odslušanog trećeg semestra, a najkasnije do kraja četvrtog semestra.

Član 30.
(Predaja završnog magistarskog rada)

- (1) Završni magistarski rad se može predati na ocjenu i dalji postupak nakon položenih svih ispita i izvršenih svih drugih obaveza predviđenih studijskim programom i drugim aktima Univerziteta FINRA.
- (2) Postupak odobrenja teme, izrade i odbrane završnog magistarskog rada provodi se na način i u postupku utvrđenom Pravilnikom o završnom magistarskom radu na drugom ciklusu studiju Univerziteta FINRA.

Član 31.

(Odbrana i ocjena magistarskog rada)

- (1) Završni magistarski rad kandidat mora predati na ocjenu i okončati isti odbranom završnog rada najkasnije u roku od 5 (pet) godina računajući od završetka posljednjeg semestra drugog ciklusa studija.
- (2) Ukoliko kandidat ne odbrani završni magistarski rad do roka utvrđenog u stavu (1) ovog člana, postupak za sticanje stepena magistra se obustavlja rješenjem dekana dotičnog fakulteta.
- (3) Na molbu kandidata, NNV fakulteta može produžiti rok utvrđen u stavu (1) ovog člana najduže još jednu godinu, iz opravdanih razloga (porodiljsko odsustvo, teža bolest i sl.).

IX ISPRAVE O ZAVRŠENOM STUDIJU

Član 32.

(Izdavanje diplome)

- (1) Studentu koji je izvršio sve obaveze i uspješno odbranio završni magistarski rad izdaje se diploma kojom se dodjeljuje akademska titula i zvanje magistra iz određene oblasti, uz naznaku odsjeka/smjera/usmjerenja, u skladu sa Zakonom i Pravilnikom o korištenju akademskih titula i sticanju naučnih i stručnih zvanja na visokoškolskim ustanovama koji donosi resorno Ministarstvo.
- (2) Uz diplomu se izdaje i dodatak diplomi kojom se daju bliže informacije o nosiocu diplome, nivou, sadržaju kvalifikacije, sistemu i pravilima studiranja, o postignutim rezultatima tokom studija drugog ciklusa, kompetencije i vještine koje daje diploma, te druge informacije u skladu sa propisima.
- (3) Sadržaj diplome i dodatka diplome propisuje resorno Ministarstvo, a oblik diplome, format i izgled utvrđuje Senat Univerziteta FINRA posebnim opštim aktom.
- (4) Diplomu potpisuju rektor Univerziteta i dekan dotičnog fakulteta, a dodatak diplomi potpisuje dekan dotičnog fakulteta.
- (5) Diploma i dodatak diplome su javne isprave.

X ZAVRŠNE ODREDBE

Član 33.

(Stupanje na snagu)

Pravila studiranja stupaju na snagu danom donošenja, od kada se i primjenjuju.

Broj: 03-1176-5-27/24

Tuzla, 26.12.2024. godine

PREDSJEDAVAJUĆI SENATA

